

## 2 Timoti

Yesu wel wiak kutömweri sêen wê krismaki 36 pöta ök won sêen Pool kaalak wii kaatak wê Timotiin epwer retëng ë mena. Pool pi pimtë wel wiipna akunet temanöm yesën kön weswes ëë Timoti pim Epesas kak ingre mor saurö ngarangk ëëpnaal ngan rë mena.

### **Pöt epël wia.**

Ngön ngës rëaut 1:1-2

Yoöre ërëpre wa korkor ngönöt 1:3-2:13

Weteteere pepanöm ngönöt 2:14-4:5

Pool pimtë ngönte 4:6-18

Ngön mëët 4:19-22

1-2 O Timoti nem ru ulöpöököp ne Pool Anutuuk Yesu Kristoë ngön yaaö omën sumëak neulëak tiarim wëwëet Yesu Kristooring yal mangkën nimpnaat kosang wesak niia pöten ök niamëak wes nemëaupök pep epwer retëng ë yaningk.

Anutu Pepere tiarim Aköp Yesu Kristo piarpim komre kolapre ya ngësre mayaap pöt ningkën nim naë wiaap.

### *Tiar ngönëntaan ëö ëëngan*

<sup>3</sup> Nem ëere peparöa eima pöl neenta lupmer utpetat won wiaan kengkënring wê Anutuun inëen elmëeim wë. Pël ëë nimëen yak kët ël epotë Anutuun kimang maimeë yoöre ërëp maim wë.

<sup>4</sup> Ne sëp yaniwasën nim neen yaköm ëen ing ëan pöten kön wieë ërëpërëp kësang pan ëëmaak yak niin itaampaaten kent yaë.

<sup>5</sup> Ne nim kön wi kosang pan weseim wëen pipten kön wia. Kön wi kosang ke pil pipët nim öng ëap Loisre ëlëp Yunis piarpim eimautak niinta tapël yaën pël kön yaniwi.

<sup>6</sup> Pötaanök nim könö it nganga niwesak epël nia-maan. Ngaan nem moresiar nim kepönöök yani-wiin Anutuuk welaköt elniin ngönën ya mëmpëak weëre kosang waup. Pötaanök weëre kosang pöta këet ngarangk ëak ulöl wasum.

<sup>7</sup> Nim elnia pöten kön wieë epël kön wiim. Anutu pim Pul tiar yaningk pöök kas ëëpenëak naalniin weëre kosang ëëre lup sant ëëre tiarim-tok tiarimtën ngarangk ë pël ëëpenëak yaalni. Pötaanök weëre kosang waö pöta këet ngarangk ëak ulöl wasum.

<sup>8</sup> Ni tiarim Aköpë ngönënte ök amëëtaan ëö ëëngan. Pël ëak ne pim yaat yamëngkën wii kaatak neulëaup neenta ëö ëëngan. Ni Anutuu naëaan weëre kosang wak nem yaaul ngönëntaan këlangön kat yawiem kön wiin pangk ëëp.

<sup>9</sup> Anutu pim tiar utpetetakaan niwak wotpil öpenëak yaö niia pöt tiarim ompyaö nentaan won. Ngaanëër pan Anutu pi yang epër won wiaan Yesu Kristook tiar ompyaö niwasëpnaat pël kön wia pötak komre kolap elnia.

<sup>10</sup> Pim komre kolap elnia pötak peene tiarim utpetetakaan niwaup, Yesu Kristo, jaaröön tekeri yes. Kristo pi weleta weëre kosangöt wa olëak pim ngön ompyautak wëwë kosang wiakaim wiaapna pöt war wes yaningk.

<sup>11</sup> Pël ëën Anutuuk ne pim ngön yaaö omën sak ngön ompyaö pöt aöre rë moulö pël ëëmëak neulëaup.

12 Pël äaut pötaanök ne käämre këlangönring wëaup. Pël ëëë pöten ëö naën nem kön wi kosang yewesaup Anutu pöpön kön selap naën yaaup pi weëre kosangringöpök nem ya yamëngkautre wëwëet ngarangk elnëëpënëak yemangk pöt pout ngarangk ëak wëën akun kaöaö temanöm sëpnaat.

13 Ngön yaap nem këmtakaan ök yeniak pipta ököök ëëm. Ni Yesu Kristooring yal menak wë ngön pipët piin kön wi kosang wasöore lupmerök sant mowasö pël ëëmëën yeniak pipël ëëm.

14 Ni Anutuuk omën ompyaö ngarangk ëëmëak nina pipët ompyaö wesak ngarangk ëëm. Ngëëngk Pul tiarim lupmeri wia pöök kaamök elniaan ya pipët mëmp.

15 Ni ëwat wëën. Esia yangerak ngönën omën pourö ne sëp newesaut. Pitëm naëaan Piselasre Emosenis piaripta.

16 Aköp pi Onesiporas pim öngre ruuröen yaköm elmëëp. Pitëm pepapök ne wii kaatak wëën kaaö naalnëën akun kësang nem naë wais ya kë newe-seimaup.

17 Pi Rom kak wais neen ap weseim wiak nokoiraut.

18 Aköpök kön wiin pangk ëën akun kaöaöök yaköm elmëëp. Pi Epesas kak nemëën inëën ya kësang mëneimaut. Pöten iteneimaup niinta ëwat wëën.

## 2

*Poolök Timotiin Yesu Kristoë nga omën sëpënëak mëä*

<sup>1</sup> Nem ruup ni, tiar Yesu Kristooring yal menak wëen komre kolap yaningk pötak weëre kosang sak öm.

<sup>2</sup> Pël ëak omnaröa itöök nem ngönën ök niaan kat wia pipot nuukta tapël omën naröen kön wiin ya ompyaö mëmpnaarö pël ëen pöt pitën maan omën muntaröen ök map.

<sup>3</sup> Ni Yesu Kristo pim nga omën ompyaö namp pël sak tenring këemre këlangönë rangk öm.

<sup>4</sup> Ne nim ömëel pöten kön wiimëek yak ngön nokoliit ök niamaan kat wi. Omën namp kööre tokörö il wasëpënëak nga yaatak wë pi ya muntat namëngkën yaaup. Ngaaröa kaöpök pim yaaten itenak kent ëëpënëak nga ya kopëtet ompyaö wesak mëmpnaat.

<sup>5</sup> Ën namp pi omën muntarö il mowasëpënëak ngaal witwit yeem ngasam pöta ngön kosangta ënëm naën ëëpna pöp këet naön ëëpnaap.

<sup>6</sup> Ën namp pi ya lupöök akun poutë ya kaö mëneim öpna pöp puuk wet rëak ya lupöökaan kaömp këet öpnaap.

<sup>7</sup> Ngön pipot ingre mor saurö tiarim wëwëeten ya. Aköpök kön koir ningkën nem ngön ök yeniak pipotë këetön ewat sumëet. Pötaanök kön wiaam.

<sup>8</sup> Ni Yesu Kristoon kön wiaam. Pi omën omp ak Tewit pim ëapök weletakaan wal ëaup ngön pöt ngönëntak ök ni yeë pöt.

<sup>9</sup> Ne ngön ompyaö pipot ök yaan omnaröak nem ngönten kaaö ëen utpet yaauröen yaalmë pöl këemre këlangön ke nentere nent kat yenewi. Pit wii yenetë. Pël ëautak Anutu pim ngönte wii natëen yaë.

<sup>10</sup> Pötaanök ne Anutuu yaö wesaurö pitëmëen këemre këlangön epot kat yawi. Pit Yesu Kristook utpetetakaan moön Anutuu ëwaatak wakaim öpënëak këlangön kat yawi.

<sup>11</sup> Ngön epël wia epët yaap.

“Tiar pim weletak yal menan pöt wëwëetakta yal mempenaat.

<sup>12</sup> Tiar këlangön kat yawiem weë ngentiipena pöt piiring ngarangk sëpenaat.

Tiar pi yak mowasëpena pöt puukta tiar yak niwasëpnaat.

<sup>13</sup> Tiarim ngön kosangët wiap sëpna pöt pim ngön kosangët kosang sak wiaapnaat.

Pi nalre nal naën yaaup.”

*Ya omën namp Anutuuk itaangkën ompyaö yaë pöta ngönte*

<sup>14</sup> Ni ngön epët ngolöp wesak Anutuu ëöetak omnaröen mëak pit ngön utpetatëen nga elepan pël mam. Pël yaë piptak kaamök naalmëen ngön utpet pötök pöt kat yawiaurö utpet yemowas.

<sup>15</sup> Anutuuk niin kön wiin kë sëpnaataan weë ngentiak yaat mëmp. Pël yeem ngön këët wotpil tekeri wesak maim wëen omën ëöaat nim rangk nawisën ëëpnaat.

<sup>16</sup> Ngön pas kë won Anutuu kent naën pipot apan. Pipotök utpetatë kanöök wes mëen Anutuun kasëng mempanëen.

<sup>17</sup> Kaar pipot ëmpöl kaöatë yaë pöl ulöl sak utpet yewas. Omën ke pil yaauröakaan naar Aimeniasre Pailitas.

<sup>18</sup> Piarip irikor ëak ngön këët kasëng menak ënëmak weletakaan wal ëëpenaat ya pöt yok oröa

pël kaar aimeë omën muntaröa kön wi kosang yewasaut utpet weseim wë.

19 Pël yaatak Anutuuk pim ingre morörö tiar ka wap ket ëak wesirën taintaë taua. Wap pöta möönöök ngön epël wia. “Aköp pi pim omnaröen ewat wë.” Pël ëak munt nent epël wia. “Omën Aköpön, ‘Yaap pi tiarim Aköp,’ pël maimeë pim yapinte wak yaaurö pit utpetat kasëng mamp.”

20 Omën omnant kësang wieëaupë ka kaöetak kelön nant omën sum kësangët koolre siluwa pötök ket ëere këraare yangatök ket ë pël ëaut wia. Nant ya kaöatë yaut, nant pasutë yaut pël ëak wia.

21 Namp pi omën pas pöt kasëng menak pim lupmer kölam wasën pöt pi kelön ya kaöatë pötë ök sëpnaat. Pël ëen Ka Pepapök piin kön wiin ompyaö ëen peram mowasën pi yaap Ka Pepapëen ya ompyaö ke nentere nent mëmpnaat.

22 Timoti ni omp ulwasöröa kentre kaur yaaut sëp mowesak öm. Pël ëak omën lup kölamring wë Anutuun kaamök elmëëpënëak maim wëauröaring wotpil wëere kön wi kosang mowasö, lup sant elmëere mayaaptaring wë pël ëëmëen weë ngen-tiim.

23 Ni köpël ngön utpet pipot kasëng mamp. Pipotök nga koir yaë pöten ewat wëen.

24 Aköpë inëen yaaö nampök ngaal witwit ngön epan. Pi omën pourö ngötre kar elmëimeë ompyaö wesak ngönën ök maim öp. Pël yaëen nampök piin utpet yaalmëen pöt ya sangën elmëëpan.

25 Pël ëak omën pim ngön wa olë yaaurö pitën wiapre kor elmëak pitëm könöt wotpil mowasëp.

Pël eën pit Anutuuk kaamök elmëen lup kaip tiak ngön këët ewat sêpën sa.

<sup>26</sup> Pël ëak pitëm lupöt kan tëen ngaanëer Setenök pim ngön ngaarëk öpënëak kalaapö mowiin wak wakaima pôrekaan ent ë olëak ompyaö sêpnaat.

### 3

*Akun kaöaö temanöm yesën wa irikor kësang orööpnaat*

<sup>1</sup> Ni epël kön wiaam. Akun kaöaö temanöm yesën könöm ke nentere nent orööpnaat. Pöt epot.

<sup>2</sup> Omnarö pitëmtën kent eën keimön ëëpnaat, monatön kentre kaur ëëpnaat, pitëmtën wak isak apnaat, ieping ëëpnaat, Anutuun ökre was apnaat, pitëm ëlre peparöa ngönöt wa olapnaat, omnant mangkën yoöre ërëp nemaan ëëpnaat, Anutuun ngëëngk nemowasën ëëpnaat,

<sup>3</sup> omën pitring irëauröenta ngöntre kar naën ëëpnaat, omnaröak mayaap elmëëpënëak yaëen kangiir nga elmëëpnaat, omnaröen ökre was apnaat, pitëmtok pitëmtë koröpötön ngarangk naën ëëpnaat, kentre imënöröa yaë pöl ëëpnaat, omën ompyaö yaautön kööre tok ëëpnaat,

<sup>4</sup> pitëm karuröen morök elmëak kööre toköröa moresi moulmëëpnaat, teënt pan köntak pitëm kön ëngk ma e pötë ënëm ëëpnaat, pitëmtok omën kaöarö pël kaar apnaat, koröpöökë omnantön kent yeem Anutuun kent naën ëëpnaat.

<sup>5</sup> Pël yeem pit koröpöök Anutuu ënëm yaaö kaarkaar sak wë Anutu kasëng menak öpnaat. Ni omën ke pilörö kasëng mamp.

<sup>6</sup> Pitëm naëaan narö ëlëep ka nantë së ilëak öng kön wonöröen ngön kaar ke nentere nent mëak pitëm ngönën kaar pötë ënëm ëëpënëak morök yaalmë. Öng pörö pitëm saunatë könömöt wetak wë kön selap wëaurö kentre kaur ke nentere nent pötök wer moön ënëm yaaurö.

<sup>7</sup> Pit kët ël epotë ngön kat wiak kön ya mëneimeë ngön këeta songönte ëwat nasën yaaurö.

<sup>8</sup> Omën öngörö morök yaalmëa pörö ngaan Sanisre Sampris piarpim Moses pim ngönten kööre tok elmëa pöta ök ngön këetaan kööre tok yaaurö. Pitëm könöt utpet yaaurö yak kön wi kosang yewe-saut kaëngk yaaurö.

<sup>9</sup> Pitëm omnant yaautë këët kaö naarööpan. Sanisre Sampris piarpim ëa pöl köpël yaauta këët tekeri sëen omën pourö itaampnaat.

*Weëre kosang taueë Anutuu ngönta ënëm yaauta ngönte*

<sup>10</sup> Ni neering yesaup nem ngönën ök yamëëaöre kan yaaö, omnant yaaö poutë songöntere Anutuun kön wi kosang yewesaöre ya wiap yaaö, lup sant yaaöre këere ngaatë rangk wë,

<sup>11</sup> omnaröak utpetat kësang yaalnëaöre këlangön kat yawiaö pötön ëwat wëen Antiokre Aikoniamre Listra ka pötë së wë këlangön kaö kat wieim wëen Aköpök utpet pötë öngpökaan ent ë neulëaut pöten ëwat wëen.

<sup>12</sup> Omën narö Yesu Kristook yal menak Anutuu ngöntak öpna piporo kööre toköröak utpet mowasëpnaat.



<sup>13</sup> Ēn omēn utpet kaar yaurōak omnarōen morök yemaan Setenōkta pitēn morök tapēl maan utpet panē sēpnaat.

<sup>14</sup> Ni pōt, ngōn kē kat wiak kōn wi kosang wesang pipot taintaē wak ōm. Ni ten ngōn pipot rē niulaurōen ēwat wēen.

<sup>15</sup> Nimtēnta ēwat wēen. Nim kotuukaan ngēēngk ngōnēn pepewer sangk kelak kat wieimaup yak pōtak kōn ompyaut ningkēn Yesu Kristoon kōn wi kosang wasēn Anutuuk utpetetakaan niōpnaap.

<sup>16</sup> Ngōnēn pep pipot pout Anutu pimtē Pulōōkē kaamōktak orōaut. Pōtaanōk ngōn pipotōk ēwat ninak tiarimtē utpetatōn pet yaalni. Pēl ēak tiarim wēwēat ompyaō niwesak wotpil ōpena pōt rē yanuul.

<sup>17</sup> Kopēta niwasēn Anutuu omēn kē panē sak ya ompyaō ke nentere nent mēmpenēak ngōnēn pep pōt orōa.

## 4

### *Poolōk Timotiin Anutuu ngōn kēēt kosang wesak ōk mapēnēak mēēa*

<sup>1</sup> Ne Anutuu ēōetakre Yesu Kristo omēn wel wiaare ōp wēaurō tiarim ngōnte ē pet irēpnaapē ēōetak pim akun kaōaōōk wais wa ngaōōk nimēēpna pōtaan kosang wesak epēl niamaan kat wiim.

<sup>2</sup> Anutuu ngōnte ōk mēak omēn pōtaan kent yaurōere kaaō yaaō pourōen wiap elmēak kosang wesak ōk mam. Pēl ēēn ngōn pōtak elmēēn pitēm lupōt it nganga sēp. Pitēm utpetatōn nga maan lup kaip tiip. Konōt kosang mowasēn Anutuu kanōōk

söp. Pël yaëen kët ël epotë wiap elmëak këëkë wesak rë mouleim öm.

<sup>3</sup> Ënëmak akun nent temanöm sëen omnarö wot-pil ngönten kaaö ëak pitëmtë kentötë ënëm eimeë ngönën kaaröt kat wiipënëak yeem pëel maan rë yemoula ke nampre nampörö wais rë mouleim öpnaat.

<sup>4</sup> Pël ëen pit ngön këët kasëng menak ëlar ngön pöt kat wieim öpnaat.

<sup>5</sup> Ni pöt, kët ël epotë kön tektektaring wë këëmre këlangönë rangk öm. Pël ëëë omnaröen ngönën ök maim öm. Nim omnarö kaamök ëak ngönën ök yemaan ya pöt panë wesak mëmpeim öm.

### *Pool pi ya pet irëpënëak mëëa*

<sup>6</sup> Wain iit Anutuun kiri yaalmë pöl nem iit lë olemëak yeë. Nem wëwë epët söp wasuma akunet temanöm yes.

<sup>7</sup> Ne nem yaat weë ngentiak mëneimaut. Nem yaat mëmpö wais pet ir yoolak. Kan yaö neea pöök mësaö wais yaö neeaurek jaarö. Nem kön wi kosang yewesaut wil këlok naën.

<sup>8</sup> Pël ëen peene pöt kutömweri ul ë rangiaut, sum kësangring omën wotpilöröaan yaö ëa pöt nemëen ëaut akun kaöaöök Omp Aköp, ngön ë pet yairaö wotpilëp puuk nampnaat. Pöt nemënt pëen won, pim orööpna akuneten kent ëak kor wakaimaurö pitta mampnaat.

### *Ngön mëët*

<sup>9</sup> Peene teëntom nem naë waisum.

<sup>10</sup> Timas pi yangerakë omnantön kentre kaur ëak ne söp newesak Tesalonaika kakë sa. Pël

ëen Kresen piita Kalesia yangerakë yesën Taitasta Talmesia yangerakë sa.

<sup>11</sup> Pël ëen Luk pimënt tenip wë. Pötaanök ni Maak koirak arip waiseë. Pi yok pangk ya kaamök elnëëpnaap.

<sup>12</sup> Tikikas pöpökëer nook wes mëen Epesas kakël sa.

<sup>13</sup> Nim waisumë pötak nem ulpëen waliip Troas kak Kapas pim kaatak wiaan pöp wak waisum. Pël ëak pep pepatring ket ëautre imën koröpöök ket ëaö pipotta wak waisum. Ne pep imën koröpöök ket ëaö pipotön kent pan yaë.

<sup>14</sup> Ainötök omnant ket yaaup Alesanta pi utpet kaö elnëaut. Pötaanök Aköpök kangut mampnaat.

<sup>15</sup> Niinta omën pöpön ngarangk këëkë ëëm. Pi kosang ëak tenim ngönöt wa olëaup.

<sup>16</sup> Wet rëak nem ngön yaatak neulëa pötak omën namp ne kaamök naalnëën, won pan. Omën pourö ne sëp newesa. Aköpök pitëm korar elnëa pöta kangut won wes moolap.

<sup>17</sup> Aköp neering wë ngönën ulöl wasën köpël omnaröeta kat wi pet irëpënëak kaamök elnëak weëre kosang nenak utpet kaöatë naëaan ent ë neulëaut.

<sup>18</sup> Aköp pi utpet ke nentere nenta öngpökaan newak ompyaö wesak kutömweri wa ngaöök nemëëpnaap. Tiar akun poutë pim yapinte ngaarëk wak aim öpa. Yaap.

<sup>19</sup> Ne Akuilaare pim öngöp Prisilaare Onesiporasë öngre ruurö pit pouröaan yowe yemak pël ök mam.

<sup>20</sup> Erastas pi Korin kak wakaimaup. Tropimas yauman ëen Mailitas kak ent ë moulmëaut.

<sup>21</sup> Kentre wap akunet temanöm sēpanēen teënt waisum.

Yupulasre Putenre Lainasre Klotiaare ingre mor eprek wēaö pourö pitta yowe yenia.

<sup>22</sup> Aköp nim kōnōpring öp. Pim komre kolap pöt arim naë wiaap.

[Yok pi tapët.

Ne nim pepap, Pool.]

**NGÖNËN PEPEWER**  
**The New Testament in the Weri Language of Papua**  
**New Guinea**  
**Nupela Testamen long tokples Weri long Niugini**

copyright © 1984 Wycliffe Bible Translators, Inc.

Language: Weri

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-10-23

---

PDF generated using Haiola and XeLaTeX on 18 Apr 2025 from source files dated 31 Aug 2023

ec1ac06d-1c8c-5be3-8326-dcf0ceacd4c2